

Azilkërkuesit në Shqipëri, 2024


Tiranë, më 04 Korrik 2025: Në vitin 2024, rezultojnë 104 azilkërkues, duke shënuar ulje, krahasuar me 261 azilkërkues në vitin 2023.

Azilkërkuesit në Shqipëri sipas vendeve kryesore të origjinës:

- Afganistani 27,9 %;
- Siria 17,3 %;
- Pakistani 10,6 %.

Përqëndrimi i kërkesave për azil: muajt me më shumë aplikime kanë qenë Marsi, Prilli dhe Qershori të cilët përbëjnë 57,7 % të aplikimeve gjithsej.

Fig. 1 Shpërndarja e kërkesave për azil sipas muajve, në %



Burimi: Departamenti për Kufirin dhe Migracionin, Drejtoria e Përgjithshme e Policisë së Shtetit

Fitimi dhe lënia e shtetësisë shqiptare

Në vitin 2024, rezultojnë 919 persona të cilët kanë fituar shtetësi shqiptare, duke shënuar ulje me 33,5 %, krahasuar me vitin 2023.

Ndërsa, 472 persona kanë hequr dorë nga shtetësia shqiptare, duke shënuar një ulje me 45,7 %, krahasuar me vitin 2023.


Për publikim: 04/07/2025

Duke analizuar vendin e origjinës të personave që kanë fituar shtetësinë shqiptare, vërehet se:

- 49,1 % janë me origjinë nga Kosova;
- 13,8 % me origjinë nga Turqia;
- 6,2 % me origjinë nga Maqedonia e Veriut.

Gjatë 2024, 33,4 % e personave që kanë fituar shtetësinë shqiptare dhe 41,3 % që kanë lënë shtetësinë shqiptare i përkasin grup-moshës 30-39 vjeç.

Fig. 2 Fitimi dhe lënia e shtetësisë shqiptare sipas grupmoshës, në %



Burimi: Drejtoria e Politikave të Shtetësisë, Ministria e Brendshme.

Për më shumë informacion dhe për të parë tabelat e detajuara, vizitoni bazën e të dhënave në faqen zyrtare të INSTAT: [Azilkërkuesit në Shqipëri, 2024](https://www.instat.gov.al/)

Metodologjia

Qëllimi i publikimit vjetor për azilkërkuesit në Shqipëri është paraqitja e rezultateve dhe treguesve për azilkërkuesit në Shqipëri sipas gjinisë, muajit të aplikimit, vendeve të origjinës, si dhe numrin e individëve që kanë marrë dhe lënë shtetësinë Shqiptare.

Të dhënat mbi azilkërkuesit dhe fitimit ose lënies së shtetësisë në Shqipëri sigurohen nga Departamenti i Kufirit dhe Migracionit pranë Drejtorisë së Përgjithshme të Policisë së Shtetit, Drejtoria e Politikave të Shtetësisë dhe Drejtoria e Politikave të Migracionit, Azilit dhe Antitrafikut në Ministrinë e Brendshme.

Përkufizime:

Azil është forma e mbrojtjes ndërkombëtare që Republika e Shqipërisë u jep refugjatëve dhe personave në mbrojtje plotësuese.

Azilkërkues është çdo shtetas i huaj ose person pa shtetësi, që ka paraqitur kërkesë për mbrojtje ndërkombëtare, për të cilën nuk është marrë ende një vendim përfundimtar i formës së prerë.

Aplikim për azil është kërkesa zyrtare e të huajit ose personit pa shtetësi para autoritetit përgjegjës për azilin dhe refugjatët, e cila vlerësohet si një kërkesë për mbrojtje ndërkombëtare, sipas Konventës së Gjenevës së OKB-së, "Mbi statusin e refugjatit". Çdo kërkesë për mbrojtje ndërkombëtare vlerësohet si aplikim për azil, përveç rastit kur i huaji kërkon qartazi një lloj tjetër mbrojtjeje, për të cilën aplikohet veçmas.

Kërkesë për azil është çdo deklaratë e të huajit ose personit pa shtetësi, e shprehur në çfarëdolloj mënyre e në çfarëdo kohe përpara autoriteteve kompetente, në pikat e kalimit kufitar apo brenda territorit të Republikës së Shqipërisë, i cili kërkon mbrojtje ndërkombëtare, sipas konventave ndërkombëtare dhe legjislationit shqiptar.

Shtetësia shqiptare fitohet, rifitohet, humbet apo lihet në përputhje me dispozitat ligjore për shtetësinë shqiptare, të cilat respektojnë normat e parimet e njohura të së drejtës ndërkombëtare në fushën e shtetësisë, të pranura nga Republika e Shqipërisë.

Shtetësia shqiptare fitohet me: a) lindje; b) natyralizim; c) birësim

Fitimi e shtetësisë fitohet nga një i huaj që ka paraqitur kërkesë për marrjen e shtetësisë shqiptare, në rast se plotëson kushtet e paracaktuara në ligj.

Lënia e shtetësisë shqiptare nënkupton se pasja e shtetësisë shqiptare merr fund sipas kërkesës së personit, kur ai plotëson kushtet e paracaktuara në ligj.

Shtetas i huaj është personi i cili nuk është shtetas i Republikës së Shqipërisë dhe ka shtetësi të huaj.

Person pa shtetësi është personi që nuk gëzon shtetësinë e asnjë shteti për shkak të mungesës së një lidhjeje të qëndrueshme juridike ndërmjet tij dhe një shteti.

Refugjat është shtetasi i huaj ose personi pa shtetësi, i cili, për shkak të frikës së bazuar të persekutimit, për arsye të racës, besimit, kombësisë, anëtarësisë në një grup të caktuar shoqëror ose bindjes politike, ndodhet jashtë vendit të shtetësisë së tij ose jashtë vendbanimit të zakonshëm të mëparshëm dhe nuk ka mundësi ose dëshirë për të kërkuar mbrojtjen e atij vendi apo kthimin në atë vend, si pasojë e këtyre rrethanave, në përputhje me kriteret e nenit 1 (A) të Konventës së Gjenevës.

Shtet apo vend i origjinës është shteti, shtetësinë e të cilit mban kërkuesi ose në rastin e personave pa shtetësi, vendbanimi i zakonshëm i mëparshëm.

Status i mbrojtjes plotësuese është njohja në Republikën e Shqipërisë e të huajt ose personit pa shtetësi, si person i pranueshëm për mbrojtje plotësuese.

Status i refugjatit është njohja në Republikën e Shqipërisë e shtetasit të huaj ose personit pa shtetësi si refugjat.